

## **Cristus, glisch, neu tier nus en nosa stgiradetgna!**

„La candeila dil manzaser sclarescha tochen alla darendida dil sulegl“, di in proverbi terc. Cu ei vegn per propi stgir, cu nus basignein la glisch, lu denton vala ella nuot pli.

Auter eis ei cun la glisch che nus envidein duront igl Advent. Pli liungas e stgiras che las notgs ein, ton pli ardan las candelas sil tschupi d'Advent. Nus spetgein sin la „glischur celestia“ che vul sclarir per tuts che sesanflan „ella stgiradetgna ed ell'umbriva dalla mort“ (Lc 1.78f).



## **Cristus, glisch, meina nus alla glisch!**

„La candeila glischa ensiviars“, di in proverbi osman. „Il fons dalla candeila ei stgirs“, quei tenor in proverbi dalla Persia.

Leu vegn denton quel che nus spetgein egl Advent. El vegn da sez, sesbassa schi afuns sco negin havess sminau, sclarescha engiu-, ed ensiviars! El sedrezza entiramein tier il Bab en tschiel e porta el medem mument glisch al fons dalla candeila; als cuntristai ed a quels senza speranza. El ei la „glisch dalla glisch“, el ei „la glisch che sclarescha als pagauns e per glorificar siu pievel d'Israel“ (Lc 2,31f).

## **Cristus, glisch, gida che nus possien retscheiver tei!**

„Stai si e daventa glisch“ – quei ei negin proverbi. Quei ei ina visiun encuraschonta dil profet Jesaja. „Stai si e daventa glisch, pertgei tia glisch daventa e la splendor dil Segner tarlischa sur da tei“ (Jes 60,1f), cloma el al cuntristau, al pievel che renunzia a sesez.

Igl affon Jesus „catta ad agur la glisch dil mund“ e vesa era la stgiradetgna. Gia sia naschientscha porta „glisch el stgir“, lai contemplar ina glisch al horizont dils bandunai e dils isolai. A tut quels ch'ei vegni „menai davos la cazzola“ vegn a sclarir ina glisch. Ussa sco era en perpetnada.

(tenor Hans Brunner)

## **Cars parochians**

Egl evangeli da Nadal vegnin nus ad udir: „Ed il Vierv ei daventaus carn ed ha avdau en nies miez, e nus vein viu sia gloria“. All'entschatta digl Advent lein nus tedlar sin quels plaids che dattan il senn al temps da preparaziun sin Nadal.

La speranza ch'ei reusseschi a nus, da sesarver danovamein per quei plaid duront ils temps d'Advent, accumpogni nus. Cheutras sa la nuvia da Jesus daventar ina „parola“ da Nadal tier Nadal. Ina „parola“ legrevla per tut quei che succeda en nosa veta e sil mund: „Gloria a Diu ell'altezia e pasch sin tiara als carstgauns da sia beinvulientscha“.

**In grazius temps d'Advent e la glisch da Nadal  
accumpogni nus.**

Sur Peter

## Informaziuns per Laax

Communiun dils malsauns: Mesjamna, ils 16-12-09 **suentermiezdi**.

### **Devoziun dallas mummas e lur affons**

mesjamna, ils 09 da december 2009 allas 15.30h en baselgia. Nus envidein cordialmein tuttas mummas ed affons a quella devoziun ch'ei dedicata alla historia "las quater glischs dil pastur Simon".

### **Advent cun ils seniors**

dumengia, ils 6 da december 2009 envida l'Uniun samaritana tut ils seniors alla sentupada d'Advent. Cordial beinvegni a tuttas e tuts.

### **Ils affons avon la stalla.**

La fiasta da s. Stiafen, ils 26 da december 2009 allas 16.30h seradunein nus avon la stalla per festivar Nadal ella cuminonza dalla famiglia e dalla pleiv. Tuts affons, gronds e pigns cun lur geniturs e confamigliars ein cordialmein beinvegni.

### **Informaziun: Cant dils treis sogns Retgs 2010**

Igl usit viva – igl entusiassem exprimiu da convischinas e convischins setegn denton en rama stretga.

Nies vitg, che dumbra actualmein buca meins che 625 casadas cun 3200 habitaziuns ha contonschiu ina grondezia che pretenda ina reorganisaziun dalla viseta dils treis sogns Retgs. Ultra da quei stat la gruppa dils treis sogns Retgs meinsvart era el center da nies vitg avon portas serradas.

La suprastonza dalla Pleiv, en collaboraziun cun las scolastas Andrea Camathias, Romana Klais e las gidontras Regula Caduff e Rosina Derungs, sestentan da mantener quei vegl usit era el futur. Nus vegnin a sentupar en divers quartiers per guder da cuminonza la viseta ed il cant dils treis sogns Retgs. Secapescha ch'ils treis sogns Retgs vegnan ad esser presents sco tochen dacheu durant la s. Messa dalla dumengia.

Ulteriuras indicaziuns suondan el Fegl parochial dil schaner. Nus sperein sin Vossa capientscha.

## Informaziuns per Falera

Communiun dils malsauns: Gievgia, ils 03-12-09 **suentermiezdi**  
Gievgia, ils 17-12-09 **suentermiezdi**

### **Devoziun per l'enschatta digl Advent**

"Las portas stretgas uss slarghei! Il Segner vegn, ils eschs arvei!" Cun il messadi da quella canzun d'Advent lein nus ir encunter Nadal. Lein buca emblidar, d'arver las portas tier il Segner e tier il proxim!

### **Devoziun dallas mummas e lur affons**

mardis, ils 8 da december 2009 allas 16.00h en baselgia. Nus envidein cordialmein tuttas mummas ed affons a quella devoziun ch'ei dedicata alla historia „las quater glischs dil pastur Simon“.

### **Survetsch divin dil plaid la vigelgia da Nadal**

Gia bia onns festivein nus la sera da Nadal cun in survetsch divin dil plaid. Tras il giug da Nadal dils affons dat quei survetsch divin ina atmosfera fetg famigliara. Quei survetsch divin vegn era frequentaus bein. Ord quei motiv vulein nus mantener quei che porta bia fretg per la gronda fiasta e sperar ch'el resti fritgeivels era durant igl onn niev 2010.

In grond engraziament a tut ils responsabels per lur engaschi, oravontut als affons, a Josefina Candrian-Casutt e Gion Giacun Casutt, sco era al Cussegl pastoral.

### **Ils affons avon la stalla**

Dumengia dalla s. famiglia, ils 27 da december 2009 allas 16.30h. Igl ei commuentont con fetg ch'ils pigns ein aviarts per la historia da Nadal e per las valurs religiusas. Ils geniturs che dattan peisa all'educaziun religiosa vegnan a sentir con bein che las sentupadas cun Diu ed enteifer la cuminonza fan. Cordial beinvegni a l'entira famiglia.

**F EGL PAROCHIAL  
Pfarrblatt  
LAAX – FALERA**

**December / Dezember  
2009**



**Uffeci parochial / Kath. Pfarramt**

Via principala 68, 7031 Laax, Plevon: Sur Peter Aregger,  
Tel. 081 921 41 12, E-mail: aregger.peter@bluewin.ch  
Secretaria dallas pleivs: Natalia Gliott Tel. 079 283 45 80  
E-mail: kath.kirche.laax@bluewin.ch  
Adressa d'internet: [www.pleiv-laax-falera.ch](http://www.pleiv-laax-falera.ch)

**Reformiertes Pfarramt Sagogn-Laax-Falera**

Pfarrer Thorsten Minuth, Encarden 24, 7152 Sagogn.  
Tel. 081 921 68 55, e-mail: minuth@kns.ch